

maisons, et tenans leurs enfans entre les bras, n'eussent-ils point esmeu à compassion? Le bestail perissant en l'eau, et ne sachant de quel costé tirer, ne t'eust-il fait pitié? Les arbres mesme flechissans et par l'impétuosité de l'eau renversez, ne t'eussent donné quelque mauvais présage? *Plusieurs inondations d'eau sont aduenues depuis le monde créé : mais il s'en trouuera peu de si pitoyables que ceste cy :* et voyla pourquoy quelques idiots et ignorans, non asseurez de la promesse de Dieu, attendoyent deuoir aduenir quelque second deluge et inondation d'eaux : les autres aussi s'estimans quelque peu plus sages, affermoient le bas de la ville tant seulement deuoir périr, pour ie ne sçay quelle occasion imaginée en leur cerueau. Et à fin que tu sois mieux informé de ce fait, ie te feray un brief récit de la situation de la ville. Lyon tient partie de la montagne, partie du plat pays : du costé de la montagne il regarde le pays de Forest, et a pour ses bornes la Saone, fleue fort doux et non impétueux, sur lequel il y a vn pont qui ioint les deux parties de la ville : du costé du plat pays, il a son aspect sur le Dauphiné, duquel il est séparé par le Rosne, et conioint par vn pont fort ample, finissant à vn bourg nommé la Guilliotiere, tellement que ceste partie est presque enclose du Rosne et de la Saone, qui a esté aucunement cause au peuple de plus grande frayeur et espouuamment. Doncques pour reuenir a nostre propos le Rosne commençant à inonder le bas de la ville et petit à petit à l'occuper, plusieurs des habitans s'enfuyans gaignoyent la montagne, avec tel effroy, que ie ne sache celuy à qui, voyant ceste pitié, les cheueux ne fussent dressez en la teste : les autres plus constans, euitant la furie de l'eau, se sauuoient de rue en rue, quittans leurs maisons, meubles et autres choses pretieuses, comme si plus ils n'en eussent eu affaire : les autres aussi surpris par l'impetuosité, se iettoient à traquer l'eau avec ce qu'ils pouuoient emporter et sauuer : d'autre costé on n'oyoit que regrets et plaintes : le vns de leurs femmes, les femmes de leurs maris, ou enfans accablez